01 掃便所的心適代

劉思瑀

「來,咱等一下欲換摒掃工課,這改予恁家已抽。」 Uah!閣欲換工課矣,這是予人期待閣驚受傷害的心情,因 為阮這班摒掃的區域,包含一間全校上恐怖的便所,咧用 這間便所的,齊是低年級的猴囡仔。

人講串驚串著,你愈無想欲拄著的,就愈會來揣你。 買彩券嘛無遮好運,兩張掃便所的單仔,就予我抽著一張, 天公伯仔,你哪會對我遮爾好啦!阮老師講,若有才調共 便所掃甲予你家已都會想欲去遐敨放,按呢就成功矣。阮 學校的便所佇我讀二年仔的時陣有翻過,新的便所會使講 是海線地區的國校上媠、上先進的。毋過經過這兩年,予 逐家與甲已經失去伊原本的模樣囉!

頭一擺去摒掃的時陣,我險仔共早起食的早頓吐吐出來。尿斗卡一沿尿滓黃黃厚厚,臭尿蘞味對樓梯行落來就鼻會著;兩間便所的壁頂、塗跤、馬桶攏有滒著黃金,垃圾的衛生紙嘛抨甲規四界,固衛生紙的所在閣擲一領穿過的內褲,誠癩寫,今這是發生啥物代誌?是遐的猴囡仔放尿相袂準?抑是共放尿當做咧沃花捎咧烏白漩?黃金的來源是上課毋敢共老師講屎咧滾,等到屎懺尻川矣才咧揣便所,所致走袂赴就沿路落?袂記得紮衛生紙只好用內褲拭?紲

落來垃圾的內褲規氣褪掉無愛穿?抑無,一間「五星級」 的便所,哪會舞甲這號形。

我從轉去教室共老師講這个狀況,老師來看了,隨提一罐洗碗精、一罐酒精俗兩副手囊予我,叫阮兩个共摒予清氣,我閣加掛兩个喙罨,準備欲來俗伊抻拚。頭起先,阮兩个攏無想欲去處理遐的垃圾仔,毋過遮的物件無清掉,賭的工課嘛袂做得,阮只好用喝拳彼步,贏的人愛處理。 天公伯仔閣份我滾耍笑,又閣是我啦!真正是欲哭無目屎。

我這个愛清氣相的看袂做得,就早暗拚命鑢,經過兩 禮拜,總算共尿滓和黃金攏鑢掉矣,阮共彼間全校上癩痔 的便所,洗甲金爍爍閣清氣溜溜。

這馬我攏會專工對樓頂走落來用這間我家己摒的便所 囉!